


GURE GAIA

Nolakoa behar du izan irakasle prestuak?

«Komunikazio eta konfiantza giroa sortu behar da»



Irakasle batek irakatsi egin behar du, hau da, ikasleei ikasgarazi egin behar die. Alabaina, definizioz hain sinplea dena praktikara eramatera ez da hain erraza. Esperientzia bera izango da benetako irakasle izaten lagunduko dizuna. Hasteko, profesionaltasuna ezinbestekoa da, ezinbestekoa sinestea probetxuzko lana egiten ari garela, eta ongi egiten dugula. Hori bai, profesional izateak, sentitzeak, ezin gaitu harrokeria zentzubakora eraman; aitzitik, bizigarri eta bultzagarri izan behar du hobetzen saiatzeko.

Irakaslea ez da irakasteko makina. Zorionez, irakasle bakoitzak bere izaera eta nortasun propioak ditu. Geure burua onartu eta garen bezala agertu behar dugu besteen

aurrean, horrela ez bada ezin izango dugulako ez besteak diren bezala onartu, ez besteengandik ikasi. Eta horretarako pertsona irekiak izan behar dugu, gurekin bat ez datozenean ere ikasleak ulertzen jakin.

Hori horrela izan dadin, oso inportantea da komunikazio giroa sortzea, konfiantza giroa sortzea; hori barik, akabot! Ordea, konfiantza giroa ezin da nahasi 'kolega' izatearekin. Gelatik kanpora, nahi duzuna, baina gela barruan irakaslea da agintzen duena, disziplina ezartzen duena. Eta horrek ez du zerikusirik agintekeriarekin eta garai bateko disziplina eta exijentziaren kontzeptuarekin.

Ander Arana, Iruñeko San Fermin ikastolako irakaslea

«Heldua eta gaztearen arteko elkarriketa behar da»



—Kaixo: zer ari zara begiratzen hain harrituta? —gal detu zuen Osaba Elefanteak—. A, badakit... neure zimurak ari zara begiratzen...

—Bai, zergatik duzu hainbeste zimur? —elefantetxoak.

—Zaharra naizelako, erantzun zuen osabak.

(A.Lobel: 'Tio elefante', Alfaguara, Madril 1985)

Hezitzailea eta gaztea. Bakoitza bere tokian, bakoitzak bere burua onartzeko eta autoestima garatzeko hainbat lan egin behar duelarik.

Nagusiak, munduan denbora dextente daramanak, berak aurkitutako bideak eskaintzen: ikasitakoa, ikasten ari dena, bizitzeko gogo, nekea, galderak...

Gazteak, bere jakinmina eskaintzen du, bere hutsuneak, bizitzeko grina, barneko sentimenduak, errebeldia, bihotza, ilusioak...

Heldua eta gaztea..., elkarriketa zail batean, dinamika liluragarrian, bakoitza egiazko bidean jator mugitzen baldin bada.

Marian Bilbatua eta Nerea Altuna, Eskoriatzako Irakasle Eskolako irakasleak

«Prestakuntza polibalentea lagungarri izan daiteke»



Irakasle ona, ikasleak ulertu eta, dakitenean oinarriturik, ezagupen berriak eraiki ahal izateko gidari ona izaten, denentzat ikas-prozesu arrakastatsua eta zoriontsua lortzen dakiena dela esango nuke.

Goian hitz gutxitan esandakoa osatzeko, ez letorkiguke gaizki zerbait gehiago eranstea. Irakasleentzat pedagogia hartzen da prestakuntza espezifikotzat, baina, soziologia, filosofia, psikologia eta pertsonaren beharrianen ezagupen globala, hau da, prestakuntza polibalentea lagungarri izan daiteke ikasleak eta beraien bizitza-ingurua hobeto ulertzeko.

Prestakuntzarekin loturik, hezitzaile ona izateko ezinbesteko zerak dira jarrera eta ahalegina. Ikasleek ondo ulertu ahal izateko aparteko garrantzia izan behar du BEHAPENAK, OBSERBAZIOAK gelako ihardunean. Pedagogiaren praktika egokia egingo du ELKARREKINTZA aurrera eramaten duen irakasleak. Izan ere, ez da uste izan behar jakituria guztia irakasleengandik datorrenik, frogaturik baitago ikasleek zenbait alderdi hobeto jasotzen dituztela kideengandik.

Ikasleei protagonismoa uzteak lagundu besterik ez dio egingo beraien autonomiari. Gelako funtzionamendua eta zenbait helburu markatzeak, berriz, haien erantzunkizunaren garapena ekarriko du. Konfiantza eta lan giroan eginiko irakaskuntza esanguratsua eta funtzionala bada, garapen pertsonala lortzeko bideak jarriko dira.

Pilare Baraiazarra Txertudi, Barakaldoko PATEko euskara teknikaria

INKESTA

1

Ordenatu itzazu 5etik 1era (5ak du garrantzi gehien eta 1ak gutxien) zure ustez irakasleek jokatu beharko lituzkeen rolak:

- Laguna
- Orientatzailea
- Informazio iturri
- Ikasteko bideak aurkitzeko laguntzailea
- Informazio berriak ulertzeko eta bereganatzeko laguntzailea

2

Ordenatu itzazu 5etik 1era (5ak du garrantzi gehien eta 1ak gutxien) ondoren azaltzen diren irakaslearen ezaugarriak:

- Jakintsua
- Atsegina
- Dakiena besteei erakusteko gogo izatea
- Lanean zorrotza izatea
- Ikasleei entzuteko prest dagoena

3

Zer egin behar du ikasleak irakaslearen lana arrakastatsua izateko?

Ordenatu itzazu 5etik 1era garrantziaren arabera (5ak du garrantzi gehien eta 1ak gutxien)

- Ikasteko gogo eta interesa jarri
- Isilik egon
- Irakasleak agindutakoa bete
- Lan egiteko jarrera baikorra
- Ikasten ari den gaiari buruzko informazioa izan

4

Zure ustez irakasleek zer baloratzen dute gehien?

- Ikasleak ikaste-prozesuan zehar egindako lana
- Azken emaitzak

5

Irakaslea ala ikasteko makinak? Zer duzu nahien, programa informatiko baten laguntzaz ikasi ala irakaslearen bidez?

- Informatikaren laguntzaz
- Irakaslearen bidez

IRAKASLE GUSTOKOENA?



Maider Lekuona

Oiartzungo Haurtzaro ikastola, 8.maila

Pazientzia handiko pertsona izan beharko luke; ematen dituen azalpenak ulertterazak egiten dituen. Horrekin batera eguneroko lana azterketak adina baloratzen dakiena eta ikasleekin jatorra dena. Baita gure beharrak ulertzen dituen ere.



Unai Jimenez

Oiartzungo Haurtzaro ikastola, 8.maila

Irakasle umoretsua izan behar du eta horrekin batera esplikatzeke garaian pazientzia handia duena.



Ana Maria Garcia

Bilboko Pagasarribide ikastetxea, 8.maila

Irakasle onak baldintza hauek bete beharko lituzke: ondo azaltzea, egunero etxeko lanak bidaltzea (gehiegi izan gabe), kontroletan gehienez bi gai sartzea eta ikasleak errespetatzea.



Naiara Justo

Bilboko Pagasarribide ikastetxea, 8.maila

Azterketa errazak ipintzen dituen. Gurekin jolasteko prestasuna erakutsi eta dibertigarria izan dadila. Garrantzitsua da irteeretan gurekin batera joatea eta era berean egun askotako irteerak prestatzea.



Ander Iraizo

Iruñeko Francisco de Jaso ikastola

Jatorra izan behar du, eta lana bastante egin. Ni mutikoa naiz, eta nahiago dut irakaslea ere mutila izatea. Galderei erantzun beharko lieke, eta etxerako lana bidali ere bai, baina ez gehiegi.



Lorea Macias

Iruñeko Francisco de Jaso ikastola

Majoa izan beharko luke, berdin zait neska edo mutila den. Klase alaiak eman beharko lituzke. Orain ez digute etxerako lanik bidaltzen, eta horrela oso ondo dago. Lasai ibiltzea gustatzen zait, horrela oso ondo nago.